

20 NOV 2000
LID-MULTIMEDIA
MDC BERBINCANG DGN NEGARA-NEGARA SELATAN AFRIKA

LANGKAWI, 20 Nov (Bernama) -- Perbadanan Pembangunan Multimedia Malaysia (MDC) sedang berbincang dengan beberapa negara selatan Afrika mengenai kemungkinan membantu mereka dalam bidang teknologi maklumat.

Pengerusi Eksekutif MDC Tan Sri Dr Othman Yeop Abdullah berkata meskipun negara-negara tersebut tergolong dalam negara miskin, mereka masih boleh menyertai Era Maklumat jika mereka mengambil langkah permulaan.

Ketua-ketua negara selatan Afrika yang menghadiri Dialog Antarabangsa Langkawi (LID 2000) di sini hari ini melawat pameran MDC yang mempamerkan pencapaian Malaysia dalam IT.

Perdana Menteri Datuk Seri Dr Mahathir Mohamad turut mengiringi rombongan ketua-ketua itu melawat pameran tersebut.

"Idea sebenar adalah kita (Malaysia) telah membuat langkah permulaan. Apa yang dilihat di sini adalah kemajuan yang telah dicapai oleh kita sepanjang tempoh empat setengah tahun yang lalu," kata Dr Othman Yeop. LID dimulakan lima tahun lalu dengan menggunakan konsep perkongsian bestari.

Pameran itu juga bertujuan memberi peluang kepada negara-negara tersebut untuk melihat kepada teknologi yang boleh diguna pakai di mana Malaysia boleh mengkhususkannya kepada mereka.

"Saya telah mengadakan perbincangan dengan Lesotho, sebagai contohnya, bukan sekadar untuk menjual tetapi juga membantu meningkatkan produktiviti mereka," katanya.

Pameran itu juga boleh menggalakkan kerjasama di peringkat perniagaan agar negara-negara boleh bekerjasama untuk memajukan teknologi.

"Dengan melihat semua ini, mereka merasakan kita begitu jauh ke hadapan tetapi empat setengah tahun lalu, kita tidak berada di tahap mana-manapun," katanya.

Dr Othman Yeop berkata MDC mengadakan perbincangan dengan beberapa delegasi yang menyertai LID seperti Algeria dan Mozambique yang akan melawat Koridor Raya Multimedia (MSC) sebelum mereka pulang ke negara masing-masing.

MSC adalah kawasan seluas 15km kali 50km yang termasuk di dalamnya Taman Teknologi, Lapangan Terbang Antarabangsa KL (KLIA) dan Putrajaya, pusat pentadbiran kerajaan.

-- BERNAMA
AZZ YBY ZK